



STINAPA TA INFORMA

NOS TA BAI SIGUI SINT MAARTEN?

Boneiru ta un isla úniko i e turistanan ku ta bin akinan sa esei. Trankilidat, espasio i un naturalesa fenomenal tantu riba komo bou di awa. Pa mantené e karakter úniko aki hopi aña pasá kaba gobièrnu di Boneiru a skohe pa “Kresementu ku mantenshon di naturalesa i kultura”. Pero tempu a kambia! Ekonomia di Boneiru ta pasando den tempu di bonansa, sigur despues ku a bira konosí ku Boneiru lo bira un “Munisipio speshal di Hulanda”. Esei ta duna invershonistanan e idea ku tur kos lo ta trankil. Den promé mitar di 2007 e poblashon di Boneiru a krese di 14.000 pa 14.500 hende, i e fin di e kresementu aki no ta na bista ainda! Hopi Boneriano ta puntrando nan mes unda ta bayendo ku nan isla trankil ku nan stima tantu. Di un banda tin e lema di kresementu ku mantenshon di naturalesa i kultura, i di otro banda Boneiru ke mesun chènsnan pa desaroyá ku Sint Maarten i Aruba a haña. Kiko esei kemen? E tantísimo proyektonan di konstruksion, tur siman mas outo riba e kareteranan, mas barku krusero ku nunca promé, tur ta señal di un desaroyo turbulento? Kiko lo resta di e naturalesa i e kultura lokal? E espasio, trankilidat i naturalesa úniko ta Boneiru su tesoro mas grandi. E galiña ku ta pone webu di oro. Lo resultá aki sinku aña ku Boneiru a mata su galiña ku ta pone webu di oro? Ku tantu pregunta ku ta pidi un kontesta ta bon pa pone tur e datonan riba un rei. Boneiru ta un di e islanan ménos poblá di hinter Karibe. Ku su superfisie di 288 km kuadrá e ta e di dos isla di Antia. Kòrsou ku su 444 km kuadrá ta esun mas grandi. Boneiru ta mas grandi ku Aruba, Sint Maarten i Sint Eustatius poné huntu. Aruba ta konta ku mas di 100.000 habitante. Riba e parti hulandes di Sint Maarten ofisialmente ta biba 50.000 hende, i ta kalkulá un 30.000 ilegal mas. Tantu riba Aruba komo Sint Maarten tin hopi imigrante di prinsipalmente Colombia, Venezuela, Santo Domingo i Haiti. Riba tur dos e islanan aki e poblashon lokal ta puntrando su mes ta ken ta e legítimo Rubiano òf San Marteño. Naturalesa a pèrdè riba tur dos isla dor di desaroyo turístiko. E kultura lokal a sufri dor di e kultura ku e hopi imigrantenan i turistanan a bini kuné. Ban spera ku Boneiru lo keda di e Bonerianonan. *Skirbi pa Trix van Bennekom, tradusí pa Marcel Nahr.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALES



Traha huntu na un desaroyo duradero pa Boneiru